

MOCIÓN SOBRE A REALIZACIÓN DUNHA CAMPAÑA PARA ERRADICAR OS VERTIDOS INCONTROLADOS NO TERMO MUNICIPAL

O Grupo Municipal do Partido Popular no Concello de Santiago, ao abeiro do establecido na normativa de aplicación eleva a esa Alcaldía, para a súa inclusión na Orde do día a debater no Pleno da Corporación, a seguinte **MOCIÓN**

EXPOSICIÓN DE MOTIVOS

A proliferación de vertidos incontrolados constitúe un grave problema ambiental contra o que é preciso loitar desde diversas fronteas para evitar as consecuencias que poden xerar na contaminación dos solos, das augas superficiais e acuíferos subterráneos, na contaminación atmosférica, nos impactos visuais e na alteración da paisaxe, nos riscos de incendio e para a saúde pública.

No caso do Concello de Santiago, esta práctica debe encadrarse nunha falta de civismo e de concienciación ambiental se temos en conta que existe un completo sistema de xestión de residuos que permite un correcto tratamento, unha cómoda recollida e con carácter xeral a gratuidade de servizo. Un sistema de inclúe unha amplísima rede de recollida domiciliaria dos residuos domésticos que se dirixen á planta de transferencia da Sionlla e desde alí ao complexo ambiental de Galicia en Cerceda, e dous puntos limpos habilitados no polígono do Tambre e no contorno do antigo vertedoiro municipal de Piñor, clausurado e selado cara ao ano 2005, despois da súa utilización durante unha década.

Afortunadamente, semella que o número de vertidos incontrolados foi decrecendo co paso dos anos neste Concello. Hai uns dez anos tíñanse contabilizado máis de 30 puntos de vertido incontrolado, que pasaron a ser 13 no ano 2012 e nunha campaña realizada a finais do pasado ano localizáronse sete puntos en diferentes lugares onde se ten actuado, conseguindo así rehabilitar os terreos afectados.

Desde o Grupo Municipal Popular somos conscientes de que non é doado eliminar totalmente este tipo de prácticas, en parte debido á propia dificultade para a súa detección ao tratarse, na maioría dos casos, de lugares afastados e de difícil acceso, e, en parte tamén, dada a complexidade de aplicar eficaces medidas coercitivas, pola imposibilidade que existe ás veces para atribuír a autoría do delito ambiental.

En todo caso, nun recente percorrido por distintos lugares do termo municipal sen ánimo exhaustivo puidemos comprobar a existencia de varios vertidos incontrolados, uns en lugares con antecedentes e outros en lugares dos que non había constancia, que aconsellan a adopción de medidas para a limpeza e recuperación deses espazos e, se fose o caso, a reclamación das responsabilidades que se puidesen atribuír.

En concreto, nos últimos días temos comprobado a existencia de vertidos de moi diferente natureza, destacando os procedentes de restos de obra e de materiais doméstico de gran volume, na Peregrina (á beira estrada que comunica con Marzo de Arriba), no Son de Arriba (pista de acceso ao depósito de auga do polígono do Tambre), na Granxa de San Lázaro (preto do trazado da AP-9), en Conxo (entullos de obra entre o SC-20 e a vía férrea) ou na estrada vella de Figueiras (depósito de electrodomésticos, preto da subida ao Pedroso). Mención especial merece a pista que discorre pola traseira do mercado de gando de Amio, onde se suceden multitude de vertidos de moi variada natureza, en especial restos de obra, nun punto xa habitual e recorrente que require adoptar medidas especiais.


Ante a constatación da existencia destes vertidos e da necesidade de facerlle fronte canto antes, tendo en conta o “efecto chamada” que estes amoreamentos provocan, desde o Grupo Municipal Popular propoñemos unha serie de medidas tendentes a contribuír á súa erradicación e que concretamos na presentación ante o Pleno do seguinte ACORDO:

O Pleno do Concello de Santiago de Compostela insta ao órgano correspondente do Goberno municipal a:

- ***Iniciar, cos recursos humanos e materiais do propio Concello, unha campaña de detección, eliminación de vertidos incontrolados e, se fose o caso, recuperación dos terreos afectados ao longo do termo municipal.***
- ***Proceder á unha clara sinalización deses lugares coa mención expresa á prohibición do vertido, as súas consecuencias legais, as alternativas gratuítas para o depósito e tratamento, así como a forma de contacto municipal para información e denuncias.***

- *Manter unha vixilancia periódica frecuente para tratar de descubrir, ou cando menos disuadir, aos infractores da normativa.*
- *Dirixirse ao Servizo de Protección da Natureza (SEPRONA) da Garda Civil para solicitarlle que se incremente aínda máis a colaboración coa Administración municipal nesta materia.*
- *Poñer en marcha unha campaña de información na páxina web municipal sobre a problemática dos vertidos incontrolados, con especial referencia á concienciación sobre a papel da cidadanía na súa resolución, as medidas de que dispón o Concello e as consecuencias que para o medio e para os autores teñen estes actos incívicos.*

Santiago de Compostela, 3 de decembro de 2015



Agustín Hernández
Portavoz do Grupo Municipal Popular

Sr. Alcalde do Concello de Santiago de Compostela

